

REGLUGERÐ

um Iðnþróunarsjóð.

1. gr.

Heiti sjóðsins er Iðnþróunarsjóður (Nordisk Industrialiseringsfond for Island.) Heimili sjóðsins og varnarþing er í Reykjavík. Stofnaðilar sjóðsins eru ríkisstjórnir Danmerkur, Finnlands, Íslands, Noregs og Svíþjóðar. Stofnaðilar hafa gert með sér sérstakan stofnsamning fyrir sjóðinn, dags. 12. desember 1969, og er hann birtur sem fylgiskjal með lögum um sjóðinn, nr. 9 frá 13. febr. 1970, og hafa ákvæði hans lagagildi hér á landi.

2. gr.

Tilgangur sjóðsins er:

- a) að stuðla að tækni- og iðnþróun Íslands við aðild Íslands að Fríverzlunarsamtökum Evrópu (EFTA) og auðvelda aðlögun iðnaðarins í því sambandi;
- b) að stuðla að þróun útflutningsiðnaðar á Íslandi og leggja áherzlu á aukna samvinnu á sviði iðnaðar og viðskipta milli Íslands og hinna Norðurlandanna;
- c) að efla samkeppnishæfni íslenskra heimamarkaðsiðnaðarins.

3. gr.

Stofnfé sjóðsins skal vera jafnvirði 14 milljóna Bandaríkjadollara, sem stofnaðilar leggja fram skv. stofnsamningi frá 12. desember 1969.

4. gr.

Reikningseining sjóðsins skal vera jöfn einum Bandaríkjadollar. Öll útlán sjóðsins skulu miðuð við þessa einingu. Verði breyting á stofngengi eða raunverulegu sölugengi Bandaríkjadollars, og þar með reikningseiningu sjóðsins, breytast eftirstöðvar lána, svo og greiðslur vaxta og afborgana í samræmi við það.

5. gr.

Sjóðurinn starfar einkum að verkefni sínu með því:

- a) að veita lán til ákveðinna verkefna, annað hvort einn eða í samvinnu við aðra aðila;
- b) að ábyrgjast lán, sem veitt eru af öðrum aðilum.

Fé til lánveitinga fær sjóðurinn af stofnfé sínu og tekjum, og skulu lánveitingar ákveðnar í samræmi við viðurkennd bankaleg og efnahagsleg sjónarmið. Sjóðurinn skal stefna að því að tryggja eðlilega ávöxtun stofnfjárins og forðast ónaúðsynlega áhættu.

Í sérstökum tilvikum er heimilt að veita lán með sérlega hagstæðum kjörum eða framlög, m. a. til tækniaðstoðar, rannsókna og markaðsathugana. Slík lán eða framlög mega samtals ekki nema meira en 10% af stofnfé sjóðsins.

Lán, framlög eða ábyrgðir má veita til fyrirtækja í einkaeign eða í eigu opinberra aðila og til fjárfestingarlánasjóða, sem hafa sama tilgang og Iðnþróunarsjóður.

Sjóðurinn skal hafa náð samstarf við íslenskar lánastofnanir, sem veita lán til iðnaðar.

6. gr.

Sjóðurinn skal hafa stjórn, framkvæmdastjórn og framkvæmdastjóra.

7. gr.

Stjórn sjóðsins skal skipuð fimm mönnum, einum frá hverju aðildarríki. Varamaður skal skipaður fyrir hvern stjórnarmann. Menn þessir skulu skipaðir til þriggja ára í senn. Iðnaðarráðherra skipar fulltrúa Íslands og varamann hans. Fulltrúa og varamenn hinna ríkjanna skipa stjórnvöld hvers ríkis eftir reglum er þau setja. Sjóðurinn greiðir laun stjórnarmanna og framkvæmdastjórnarmanna skv. ákvörðun iðnaðarráðherra.

8. gr.

Stjórn sjóðsins kýs sér formann til eins árs í senn, frá 1. maí til jafnlengdar næsta árs á eftir. Engar bindandi ákvarðanir má taka, nema a. m. k. 3 stjórnarmenn eða varamenn þeirra séu á fundi. Hver stjórnarmaður fer með eitt atkvæði. Til ákvörðunar þarf meirihluta atkvæða, og skal atkvæði íslenska stjórnarmannsins vera þar með.

9. gr.

Stjórn sjóðsins skal halda a. m. k. tvo fundi á ári. Formaður stjórnar og framkvæmdastjóri boða til og undirbúa fundi. Fund skal boða komi fram ósk um það frá einum eða fleiri stjórnarmanna. Fundina skal að jafnaði halda á Íslandi. Framkvæmdastjóri er ritari á fundum stjórnarinnar.

10. gr.

Stjórn sjóðsins tekur ákvarðanir um málefni hans, en í því felst m. a.:

- a) að taka ákvarðanir um lánveitingar og setja lágmarksskilyrði fyrir þeim og um ábyrgðir sem veita á;
- b) að taka ákvarðanir um vaxta- og útlánskjör sjóðsins;
- c) að ráða framkvæmdastjóra að fengnum tillögum framkvæmdastjórnar;
- d) að setja framkvæmdastjóra starfsreglur með erindisbréfi eftir tillögum framkvæmdastjórnar;
- e) að fela framkvæmdastjórninni, eftir því, sem hún telur heppilegt, að taka ákvarðanir um starfsemi sjóðsins, þar með talið lánveitingar;
- f) að skipa tvo menn til að endurskoða bókhald og reikninga sjóðsins. Skal annar þeirra vera löggiltur endurskoðandi, og hinn aðalendurskoðandi Seðlabanka Íslands;
- g) að úrskurða reikninga sjóðsins og taka ákvarðanir um ráðstöfun tekjuafgangs, svo og um afskriftir krafna sjóðsins, að fengnum tillögum framkvæmdastjórnar.

11. gr.

Iðnaðarráðherra skipar fimm menn í framkvæmdastjórn sjóðsins eftir tilnefningu eftirtalinnna aðila: Landsbanka Íslands, Iðnaðarbanka Íslands h.f., Iðnlánasjóðs, Útvegsbanka Íslands og Búnaðarbanka Íslands, sem hver tilnefnir einn mann. Varamenn skulu skipaðir á sama hátt, og skal skipunartími aðalmanna og varamanna vera þrjú ár. Ráðherra skipar formann framkvæmdastjórnar, en hún skiptir með sér verkum að öðru leyti. Framkvæmdastjóri Iðnþróunarsjóðs á sæti í framkvæmdastjórninni. Framkvæmdastjóri undirbýr fundi framkvæmdastjórnar í samráði við formann hennar. Fundi skal halda eftir því, sem þörf krefur, en þó að jafnaði eigi sjaldnar en tvisvar í mánuði.

12. gr.

Verkefni framkvæmdastjórnar eru einkum þessi:

- a) að gera tillögur til sjóðsstjórnarinnar um þau mál, er sjóðsstjórnin tekur ákvörðun um, þar á meðal um lánveitingar, framlög, ábyrgðir, ráðstöfun tekju- afgangs og afskriftir;
- b) að gera tillögu um ráðningu framkvæmdastjóra;
- c) að taka ákvarðanir um starfsemi sjóðsins, þar með talið lánveitingar og framlög, eftir því sem sjóðsstjórnin felur henni sbr. 10. gr.;
- d) að afgreiða lánveitingar og ábyrgðir skv. samþykktum sjóðsstjórnar;
- e) að undirrita skjöl sjóðsins, hafa umsjón með rekstri hans og starfsemi;
- f) að vinna að því í samstarfi við sjóðsstjórnina, að tilgangi með stofnun sjóðsins verði sem best náð.

13. gr.

Framkvæmdastjóri sjóðsins ber ábyrgð á ráðningu og uppsögn starfsfólks og daglegum rekstri. Hann annast vörzlu eigna sjóðsins, hefur yfirumsjón með bókhaldi, úrvinnslu lánsúmsókna og fer með prókúruumboð fyrir sjóðinn.

14. gr.

Til að skuldbinda sjóðinn þarf undirskrift tveggja manna, sem eiga sæti í framkvæmdastjórninni.

15. gr.

Seðlabanki Íslands skal veita sjóðnum nauðsynlega fyrirgreiðslu og starfsaðstöðu að því er varðar húsnæði, bókhald, afgreiðslu, daglega endurskoðun, lögfræðilega þjónustu, innheimtu, geymslu verðbréfa o. fl. Sjóðurinn endurgreiðir útlagt fé vegna þess.

16. gr.

Bókhaldsár sjóðsins skal vera hið sama og almanaksárið.

Í lok hvers bókhaldsárs semur framkvæmdastjórn sjóðsins skýrslu um starfið á árinu og leggur hana ásamt endurskoðuðum og árituðum ársreikningum fyrir stjórn sjóðsins í síðasta lagi 1. maí næst á eftir.

17. gr.

Iðnþróunarsjóður er undanþeginn opinberum gjöldum og sköttum til ríkissjóðs og sveitarsjóðs á sama hátt og Seðlabanki Íslands.

Sjóðurinn er og undanþeginn stimpilgjaldi af fjárskuldbindingum, sem hann kann að taka á sig.

18. gr.

Reglugerð þessi, sem sett er samkvæmt tillögum stjórnar Iðnþróunarsjóðs og með heimild í 7. gr. laga nr. 9 frá 13. febr. 1970, öðlast þegar gildi.

Iðnaðarráðuneytið, 18. maí 1972.

Magnús Kjartansson.

Arni Snævarr.